

大毘婆沙論

才七十

三百七十八
義十

50502



444

阿毗達磨大毗婆沙論卷第七十

五百大阿羅漢等造

三藏法師

玄奘奉詔譯

結蘊第二中有情納息第三之八

問住中有位為經幾時答經於少時速求生
故謂住中有於六處門徧求生緣速往和合
問若受中有即遇生緣此彼和合可速往彼
與彼緣會於中結生若遇生緣不和合者如
何彼住不經多時如有父在迦濕彌羅國母
在支那或有母在迦濕彌羅國父在支那如
是生緣難可和合如何中有速往結生答應
知有情作父母業有定不定故於父母有可
轉義不可轉義若於父母俱可轉者即往餘

父母和合處結生若於父可轉於母不可轉者即彼女人性雖貞潔受持五戒具足威儀而必與餘男子和合今中有者速往結生若於母可轉於父不可轉者即彼男子性雖賢良受持五戒威儀具足而必與餘女人和合今中有者速往結生若於父母俱不可轉者即彼有情未命終位由業力故令其父母雖有任緣而不顧戀必起相趣和合之心彼相趣時於所經處毒不能害刃不能傷火不能燒水不能溺及餘種種天橫因緣皆不能礙必得和合今彼有情既命終已適受中有即往結生問若諸有情欲常增者可隨中有速

往結生若有欲心不常增者如何中有隨往
結生如馬春時欲心增盛餘時不尔牛於夏
時欲心增盛餘時不尔狗於秋時欲心增盛
餘時不尔熊於冬時欲心增盛餘時不尔如
何有情適受中有令彼和合而往結生答由
彼有情任中有位業增上力令其父母非時
欲心亦得增盛相趣和合彼得結生有餘師
說相似類中亦得結生故無有失謂馬春時
欲心增盛餘時不尔驢一切時欲心增盛應
生馬中者以非時故轉生驢中牛於夏時欲
心增盛餘時不尔野牛恒時欲心增盛應
生牛中者以非時故轉生野牛中狗於秋時

欲心增盛餘時不介野干恒時欲心增盛應
生狗中者以非時故轉生野干中能熊於冬時
欲心增盛餘時不介羆一切時欲心增盛應
生熊中者以非時故轉生羆中雖彼形相與
餘相似而衆同分如本不轉以諸中有不可
轉故如是中有住經少時必往結生速求生
故尊者設摩達多說曰中有極多住七七日
四十九日定結生故尊者世友作如是說中
有極多住經七日彼身羸劣不久住故問若
七日內生緣和合彼可結生若介所時生緣
未合彼豈斷壞答彼不斷壞謂彼中有乃至
生緣未和合位數死數生無斷壞故大德說

曰此無定限謂彼生緣速和合者此中有身
即少時住若彼生緣多時未合此中有身即
多時住乃至緣合方得結生故中有身住無
定限問中有形量大小云何答欲界中有如
五六歲小兒形量色界中有如本有時形量
圓滿問若欲界中有如五六歲小兒形量云
何於父母起顛倒想生愛恚耶答形量雖小
而諸根猛利如本有時能作諸事業如壁等
上畫老人形其量雖小而有老相問菩薩中
有其量云何答如住本有盛年時量三十二
相莊嚴其身八十隨好而爲間飾身真金色
圓光一尋由此菩薩住中有時照百俱胝四

大洲等如百千日一時俱照梵音深妙令人
樂聞如美音鳥其聲清亮智見無礙離諸雜
染問菩薩中有若如是者法善現頌當云何
通如說

白象相端嚴

具六牙四足

正知入母腹

寢如仙隱林

答此不須通非三歲故文頌所說或然不然
諸文頌者言多過實若必須通應求彼意隨
現夢相故作是說謂彼國中夢見此相以爲
吉瑞故菩薩母夢見此事欲令占相諸婆羅
門聞已咸言此相甚吉故法善現作如是說
亦不違理菩薩已於九十一劫不墮惡趣况

最後身受此中有而入母胎是故智者不應
依彼所說文頌而言菩薩所受中有如白象形
問中有諸根爲具不具答一切中有皆具諸
根初受異熟必圓妙故有作是說中有諸根
亦有不具隨本有位所不具根彼亦不具如
印印物像現如印如是中有趣本有故如本
有時有根不具此中初說於理爲善謂中有
位於六處門徧求生處根必無缺此說眼等
非女男根色界中有無彼根故欲界中有彼
亦不定當受卵胎二類生者任中有位有女
男根至卵胎中方有不具若不尔者應無當
受卵胎生義

問一切中有形狀云何答中有形狀如當本
有謂彼當生地獄趣者所有形狀即如地獄
乃至當生天趣中者所有形狀即如彼天中
有本有一業引故有作是說若此命終受中
有者中有形狀即如此身如印印物像現如
印彼說非理所以者何無色界歿受欲色界
中有身者何所似耶豈有諸天所受中有形
如地獄寧有地獄所受中有形如諸天又色
界歿生欲界者所受中有應非女男欲界命
終生色界者所受中有應是女男是故此中
初說應理問若中有形狀如當本有一狗等
腹中容有五趣中有頓起既有地獄中有現

前如何不能焚燒母腹地獄本有多爲猛火
所焚燒故答彼居本有亦不恒燒如暫遊增
或餘地獄施設論說有時等活捺落迦中冷
風暫起有聲唱言等活等活尔時有情尋復
等活本有尚然況在中設有許恒燒如不可
見亦不可觸以中有身極微細故火亦應尔
諸趣中有雖居一腹非手觸燒業所遮故母
腹亦尔故不被燒問若在小處有情命終生
色界者如何容受色界中有大形狀耶答中
有色身微細無礙寧恐處小而不容受雖中
有形如當本有而事業等不必皆同
問諸趣中有行相云何答地獄中有頭下足

上而趣地獄故伽他言

顛墜於地獄

足上頭歸下

由毀謗諸仙

樂寂修苦行

諸天中有足下頭上如人以箭仰射虛空上
昇而行往於天趣餘趣中有皆悉傍行如鳥
飛空往所生處又如壁上畫作飛仙舉身傍
行求當生處間中有行相皆如是耶答應作
是說不必皆尔且依人中命終者說若地獄
死還生地獄不必頭下足上而行若天中死
還生天趣不必足下頭上而行若地獄死生
於人趣應首上昇若天中死生於人趣應頭
歸下鬼及傍生二趣中有隨所往處如應當

知有餘師說中有行相一切皆余所以者何
表所造業有差別故謂地獄業極穢下故初
受中有頭必歸下後隨所往行相不定生諸
天業極勝上故初受中有首必上昇後隨所
往行相不定餘三種業非極上下故彼中有
初皆傍行後隨所往行相不定復有說者一
切中有初受所造業異熟故皆表所造業有
差別地獄中有是極下業所得果故隨行動
時足上頭下諸天中有是最上業所得果故
隨行動時足下頭上餘三中有是處中業所
得果故隨行動時首之與足等無上下雖彼
所住上下不定而行動時頭足必余

問中有生時爲有衣不答色界中有一切有
衣以色界中慙愧增故慙愧即是法身衣服
如彼法身具勝衣服生身亦尔故彼中有常
與衣俱欲界中有多分無衣以欲界中多無
慙愧唯除菩薩及白淨苾芻尼所受中有恒
有上妙衣服有餘師說菩薩中有亦無有衣
唯有白淨苾芻尼等所受中有常與衣俱問
何緣菩薩中有無衣而白淨等中有有衣答
由白淨尼曾以衣服施四方僧故彼中有常
有衣服問若尔菩薩於過去生以妙衣服施
四方僧白淨尼等所施衣服碎爲微塵猶未
爲比如何菩薩中有無衣而彼中有常有衣

服荅由彼願力異菩薩故謂白淨尼以衣奉
施四方僧已便發願言願我生生常著衣服
乃至中有亦不露形由彼願力所引發故所
生之處常豐衣服彼最後身所受中有常有
衣服入母胎位乃至出時衣不離體如如彼
身漸次增長如是如是衣隨漸次後於佛法
正信出家先所著衣變為法服受具戒已轉
成五衣於佛法中勤修正行不久便證阿羅
漢果乃至最後般涅槃時即以此衣纏身火
基菩薩過去三無數劫所修種種殊勝善行
皆為迴向無上菩提利益安樂諸有情故由
斯行願於最後身居諸有情最尊勝位衆生

遇者無不蒙益是故菩薩所受中有雖具相好而無有衣願力有殊不應爲難諸有發願如白淨尼所受中有亦有衣服應知此中前說應理菩薩功德慙愧增上諸餘有情色界中有所不及故在中有位必不露形

問在中有位資段食不荅色界中有不資段食欲界中有必資段食問欲界中有段食云何有作是說欲界中有至有食處便食彼食至有水處便飲彼水由彼飲食以自存濟此說非理所以者何中有極多難周濟故謂契經說如從帑等瀉粳米等置倉鑊中數極稠密五趣有情所受中有散在處處數量過彼

若彼受用諸飲食者一切世間所有飲食唯
供狗犬一類中有尚不周濟況餘中有而可
充足又中有身既極輕妙受鹿重食身應散
壞應作是說中有食香非食麁質故無前過
謂有福者歆饗清淨華果食等輕妙香氣以
自存活若無福者歆饗糞穢臭爛食等輕細
香氣以自存活又彼所食香氣極少中有雖
多而得周濟

如是中有有有種種名或名中有或名健達縛
或名求有或名意成問何故中有或名中有
答居死有後在生有前二有中間有自體起
欲色有攝故名中有問餘有亦在二有中間

有自體起三有所攝寧非中有荅若有居在
二有中間輕細難見難明難了立中有名餘
有雖在二有中間麤重易見易明易了不名
中有復次若有居在二有中間是界是生非
趣所攝名爲中有餘有雖在二有中間界生
趣攝故非中有復次若有居在二有中間已
捨前趣未至後趣說爲中有餘有雖在二有
中間而未捨前趣或已至後趣故非中有問
何故中有名健達縛荅以彼食香而存濟故
此名唯屬欲界中有問何故中有名求有耶
荅於六處門求生有故如住中有求後有心
相續猛利住餘不尔故獨中有立求有名問

何故中有復名意成。若從意生故，謂諸有情或從意生，或從業生，或從異熟生，或從姪欲生，從意生者，謂劫初人及諸中有、色、無色界，并變化身、從業生者，謂諸地獄，如契經說：地獄有情業所繫縛，不能免離，由業而生，不由意樂。從異熟生者，謂諸飛鳥及鬼神等，由彼異熟勢輕健，故能飛行空，或壁障無礙。從姪欲生者，謂六欲天及諸人等，諸中有身從意生，故乘意行，故名爲意成。

世尊經中作如是說：三事和合，得入母胎。父母俱有染心和合，母身調適無病，是時及健達縛正現在前，此健達縛。尔時二心展轉現

前入母胎藏此中三事和合者謂父及母并
健達縛三事和合父母俱有染心和合者謂
父及母俱起姪貪而共合會母身調適無病
是時者謂母起貪身心悅豫名身調適持律
者說由母起貪身心渾濁如春夏水渾濁而
流不能自持名身渾濁母腹清淨無風熱痰
乎增逼切故名無病由此九月或十月中任
持胎子令不損壞言是時者謂諸母邑有穢
惡事月月恒有血水流出此若過多由稀濕
故不得成胎此若太少由乾稠故亦不成胎
若此血水不少不多不乾不濕方得成胎名
爲是時是中有者入胎時故謂母血水於最

後時餘有二滴父精最後餘有一滴展轉和
合方得成胎及健達縛正現在前者謂即中
有此處現在前非於餘處非前非後此健達
縛亦時二心展轉現前入母胎藏者謂健達縛
將入胎時於父於母愛恚二心展轉現起方得
入胎若男中有將入胎時於母起愛於父起
恚作如是念若彼丈夫離此處者我當與此
女人交會作是念已顛倒想生見彼丈夫遠
離此處尋自見與女人和合父母交會精血
出時便謂父精是自所有見已生喜而便迷
悶以迷悶故中有麤重既麤重已便入母胎
自見已身在母右脇向脊蹲坐亦時中有諸

蘊便滅生有蘊生名結生已若女中有將入胎時於父起愛於母起恚作如是念若彼女人離此處者我當與此丈夫交會作是念已顛倒想生見彼女人遠離此處尋自見與丈夫和合父母交會精血出時便謂母血是自所有見已生喜而便迷悶以迷悶故中有麤重既麤重已便入母胎自見已身在母左脇向腹蹲坐介時中有諸蘊便滅生有蘊生名結生已諸有情類多起如是顛倒想已而入母胎唯除菩薩將入胎時於父父想於母母想雖能正知而於其母起親附愛乘斯愛力便入母胎餘隨所應義如前說

問中有何處入於母胎有作是說中有無礙
隨所樂處而便入胎問若中有身無能障礙
如何依住此母胎中答業力所拘故依此住
有情業力不可思議無障礙物令有障礙是
故於此不應爲難應作是說中有入胎必從
生門是所愛故由此理趣諸雙生者後生爲
長所以者何先入胎者必後出故問菩薩中
有何處入胎答從右脇入正知入胎於母母
想無婬愛故復有說者從生門入諸卵胎生
法應尔故問輪王獨覺先中有位何處入胎
答從右脇入正知入胎於母母想無婬愛故
復有說者從生門入諸卵胎生法應尔故有

餘師說菩薩福慧極增上故將入胎時無顛
倒想不起姪愛輪王獨覺雖有福慧非極增
上將入胎時雖無倒想亦起姪愛故入胎位
必從生門

施設論說若彼父母福業增上子福業劣不
得入胎若彼父母福業劣薄子福業勝不得
入胎要父母子三福業等方得入胎問若富
貴夫夫與貧賤女合或富貴女人與貧賤男
合如何中有亦得入胎答富貴男子與貧賤
女人合時必於自身起下劣想於彼女人生
尊勝想富貴女人與貧賤男子合時必於自
身生下劣想於彼男子起尊勝想貧賤男子

與富貴女人合時必於自身生尊勝想於彼
女人起下劣想貧賤女人與富貴男子合時
必於自身起尊勝想於彼男子生下劣想子
於父母將入胎位應知亦然故入胎時皆有
等義

問中有微細一切牆壁山崖樹等皆不能礙
此彼中有爲相礙耶有作是說此彼中有亦
不相礙以極微細相觸身時不覺知故復有
說者此彼中有亦不相礙以相遇時此彼展
轉有語言故問若尔寧說中有無礙荅於餘
無礙非謂中有問此彼中有皆相礙耶荅自
類相礙非於餘類謂地獄中有但礙地獄中

有乃至天中有但礙天中有有作是說劣礙
於勝以麤重故勝不礙劣以細輕故謂地獄
中有礙五中有傍生中有礙四中有鬼界中
有礙三中有有人中有礙二中有天中有唯礙
天中有

問神境通力與中有位諸有所行何者爲疾
有作是言中有行疾所以者何經說業力勝
神通故如是說者神境通力行勢迅速非諸
中有問若尔何故經說業力勝神境通荅依
無障礙故作是說不依行勢謂佛神通能礙
一切有情神通獨覺神通除佛能礙諸餘神
通舍利子神通除佛獨覺能礙一切有情神

通大目軋連神通除佛獨覺及舍利子能礙
一切有情神通諸利根者神通能礙一切鈍
根者神通無佛獨覺一切聲聞及餘有情呪
術藥物能礙中有令不往趣應受生處然必
往彼隨類結生由此契經說諸業力勝神通
力若依行勢而作論者應說神通勝於中有
問中有爲能手相見不答能手相見問誰能
見誰有作是說地獄中有唯見地獄中有乃
至天中有唯見天中有有餘師說地獄中有
唯見地獄中有傍生中有見二中有鬼界中
有見三中有有人中有見四中有天中有見五
中有復有說者地獄中有見五中有乃至天

中有亦見五中有問諸本有眼見中有不有
作是說地獄傍生鬼人趣眼不見中有唯天
趣眼能見中有問諸天趣眼誰能見誰有作
是說四大王衆天眼除自上處中有見下中
有乃至他化自在天眼除自上處中有見下
中有初靜慮天眼除自上處中有見下中有
乃至第四靜慮天眼除自上處中有見下中
有復有說者欲界天眼不見中有色界天眼
能見中有唯能見下不見自上若作是說無
生得眼能見第四靜慮中有應作是說住本
有者諸生得眼皆無能見中有身者唯極清
淨修得天眼能見中有問云何知然答契經

說故謂契經說若男若女具淨尸羅修諸善法彼命終已得意成身如白衣光或如明夜極淨天眼乃能見之若男若女毀犯淨戒作諸惡法彼命終已得意成身如黑羶光或如暗夜極淨天眼乃能見之由此故知任本有者諸生得眼皆無能見中有身者毗奈耶說度使魔羅伽誅藥叉提婆達多毗盧宅迦皆即此身陷入無間大地獄中受諸劇苦問此等爲受中有身不荅受中有身然以迅速難可覺知故作是說初一刹那死有蘊滅中有蘊生後一刹那中有蘊滅生有蘊生由此迅速難可覺知有作是說彼於佛等起重惡行

臨命終時身極厚重故此大地不能持彼如
油沃沙即便陷入既入地已方乃命終受中
有身後生地獄是故說彼皆即此身陷入無
間大地獄中依初陷時而作是說有餘師說
彼業猛利未及命終無間地獄火焰上涌纏
縛彼身牽入地獄彼於中路方乃命終受中
有身後至地獄捨中有身方得生彼依初去
時而作是說亦不違理

如契經說今時天帝即於佛前說伽他曰

大仙應當知 我即於此座 還得天壽命
唯願尊憶持

問天帝今時有死生不設今何失二俱有過

所以者何若有死生應受中有如何時衆恒見彼身若無死生如何彼說還得天壽答應作是說彼無死生問若尔善通前所設難伽他所說當云何通答依脫惡趣故作是說謂佛爲彼略說法要彼見真諦得預流果於諸惡趣畢竟解脫隨意所樂人天受生故於佛前歡喜踊躍作諸愛語說此伽他如人因他解脫牢獄隨意所樂歡娛遊適還至他所作如是言我賴汝恩還得壽命天帝亦尔故不相違復次彼依解脫見道所斷諸煩惱病故作是說謂佛爲彼略說法要令斷一切見道所斷諸煩惱病安住第一無病聖道及道果

中故於佛前歡喜踊躍說此伽他如人遇醫
重病得愈隨意受用諸飲食等還至醫所作
如是言我賴汝恩還得身命天帝亦尔故不
相違復次彼依獲得四神足壽故於佛前說
如是頌如契經說苾芻當知何等為壽謂四
神足卅尊為彼略說法要令不起座得四神
足故於佛前歡喜踊躍作諸愛語說此伽他
復次彼依獲得慧命根故作如是說如契經
說諸命根中慧命最勝謂佛為彼略說法要
令得慧命故於佛前歡喜踊躍作諸愛語說
此伽他問豈天帝釋先無慧根今聞法已方
乃獲得答先雖有慧而是有漏今得無漏故

作是說復次彼依解脫五種衰相故作是說
謂諸天中將命終位先有二種五衰相現一
小二大云何名爲小五衰相一者諸天往來
轉動從嚴身具出五樂聲善奏樂人所不能
及將命終位此聲不起有說復出不如意聲
二者諸天身光赫弈晝夜恒照身無有影將
命終時身光微昧有說全滅身影便現三者
諸天膚體細滑入香池浴纔出水時水不著
身如蓮華葉將命終位水便著身四者諸天
種種境界悉皆殊妙漂脫諸根如旋火輪不
得暫住將命終位專著一境經於多時不能
捨離五者諸天身力強盛眼嘗不瞬將命終

時身力虛劣眼便數瞬去何名爲大五衰相
一者衣服先淨今穢二者華冠先盛今萎三
者兩腋忽然流汗四者身體欬生臭氣五者
不樂安住本座前五衰相現已猶可轉後五
衰相現已不可轉時天帝釋已有五種小衰
相現不久當有大衰相現心生憂怖作是念
言誰能救我如是衰厄我當歸誰得免斯難
作是念已便自了知除佛世尊無能救護尋
詣佛所求哀請救佛爲說法便得見諦令彼
衰相一時皆滅故於佛前歡喜踊躍作諸愛
語說此伽他諸有欲令順現受業引衆同分
彼作是說天帝即於聽法座上更新引得命

等八根諸有欲令順現受業不能引得衆同
分者彼作是說天帝即於聽法座上除五衰
相身位如本由此理趣故無死生有餘師說
時天帝釋亦有死生問若介善通伽他所說
前所設難當云何通謂有死生必受中有如
何時衆恒見彼身荅一切天中本有中有皆
是化生諸化生者死無遺質中有迅速故衆
不知天帝釋身而有間斷問施設論說天初
生時如五歲等小兒形量天懷膝上歎介化
生彼天便謂是我男女此新生天亦言彼天
是我父母其量既小如何時衆皆見如本荅
初生雖小生已尋大時聞迅速衆不覺知復

有說者衆雖覺知而作是念此天帝釋神力自在於世尊前自現神變或大或小不謂死生有餘師說非一切天於初生時身量皆小如帝釋等大威德天於初生時及中有位皆如本有盛年時量故雖死生而衆不覺如是說者彼無死生故二說中初說爲善經死生者身心變故

施設論說劫初時人有忽腹行身形旣變共号爲地復有欬然生第三手身形旣變共号爲象問如是轉變有死生不設尔何失二俱有過所以者何若有死生應受中有如何衆人不見間斷若無死生如何人趣即作傍生

荅應作是說彼無死生問若尔善通前所設
難如何人趣即作傍生荅非即人趣轉作傍
生但彼身形前後有異於中有說彼恒是人
然宿業因興衰不定初福業勝故作人形後
時食惡諂曲增故人形相滅變似傍生如或
有人被他呪術變似驢等而實是人復有說
者彼是傍生然彼適從極光淨歿乘宿惡業
受傍生趣前福餘勢初時似人後時食惡諂
曲增故人形相滅復傍生形如蝦蟇身前後
轉變前名蝌蚪顯黑形圓後名蝦蟇形方顯
雜然彼前後俱是傍生劫初變人應知亦尔
有餘師說彼有死生問若尔善通後所設難

前所設難當云何通謂有死生必受中有如
何衆人不見間斷答劫初時人本有中有皆
是化生諸化生者死無遺質中有迅速時人
不知彼所受身而有間斷如是說者彼無死
生故二說中初說為善經死生者多忘本事
既憶本事故非死生

說一切有部發智大毗婆沙論卷第七十

義

熊羆

上音雄 下音卑

俱脰

下珍 反

清亮

下力 反

寢

七 反

錦帟

袞鑊

胡郭 反

歆饗

上虛 下許

脊

音 迹

蹲坐

上音 存

山

崖

下魚 皆反

孺

奴侯 反

陷

胡鑑 反

赫弈

上音 下許

客

反

膚體

上音 夫瞬

詩 反

萎

烏為 反

兩腋

下音 亦

蝦蟇

二 選

上

